

廣東府縣志輯

中國地方志集成

康熙順德縣志
民國順德縣志

中國地方志集成

廣東府縣志輯③①

康熙順德縣志

民國順德縣志

附郭志刊誤

上海書店 ● 巴蜀書社 ● 江蘇古籍出版社

風有譽望者則有嚴公而舒羅
公安國余公象斗雲祚廖公萬
楚暨文學蘇公洪於癸丑二月
開局四閱月書成而余適蒙
恩爲順邑宰甫至諸先生以稿示

余曰此誠良有司之事也書已
成矣盍序諸余聞言悚然起曰
諸先生之教余也深矣余何敢
辭余今承乏於茲邑也怵怵然
隕越爲憂恐昧於風俗之宜而
斯民未被堯舜之澤有負
恩旨是志也其於事備矣於義例
詳矣今日者讀地里圖經諸志
則思夫廓清大定而百姓得休
息乎都里者皆

列聖之功與

今上之賜也讀建置志見明備之
遺焉讀祠祀志見美牆之盛焉
讀人物藝文諸志而歎人與文
不朽之難讀賦役志如觀民之

順德縣志

張序

四

疾苦而不得上聞也讀官師志
又恐懷祿之念深享大官大邑
而罔知庇也其外庶徵告戒之
必書仙釋流寓之必錄蓋猶古
者輜軒採風之遺意矣受事以

來夙夜冰兢指心以矢之明神

以質之庶終不改此操以無媿
爲牧也然而草竊間發刁斗戒
嚴撫勦之計已周窺伺之機常
伏分兵以守要害誠宜如嚴先

順德縣志

張序

五

生之言乃余之懼又不特此猶
役之苛甚於猛虎里保之困無
異驅羊殷實竭於財貧民竭於
力外憂則有盜賊內患又在豪
強積漸成風莫知禁革苟是志

達於史館一日

天子過而問焉不知下吏將何辭

以對

知順德縣事三韓張學孔書於

鳳城公署

順德縣志

張序

六



順德縣志序

培彝曩從家嚴徵君

名峻號省山舉明經屢徵未任東

髮受書肆力于先王大父廷尉侍御公

諱綬號南渠己丑進士御史督學陞大理寺少卿手澤之貽竹

簾牙籤無間風雨顧自以為僻處西陲

問所為上下古今諸如兩京三都列于

九州釋迦四部一十五國之各山大川

順德縣志

黃序

一

方言物產建置沿革或騏供圖索或豹
圍管窺良為憾事比奉

恩額貢入成均捫石鼓之遺文發四庫之

秘笈不啻山見大華水見黃河之槩尋

拜銓敘同守方州分土茲邦旋膺攝篆

竊計天下之大西北與東南盡之培彝

不敏昔也讀書碎雍今也親民大邑且

之所給耳之所聞雖不敢矜言博洽乎
然嘗全鼎于一鑿差強人意爾今

上飭意於治周禮計吏漢詔賜年一時文
治蒸蒸黎民又安更

命部臣自

神京溯列國若省若郡若州若邑悉刻有
志羅致史館勒成一代之書皇哉

順德縣志

黃序

二

右文之朝六合同風九州共貫培彝又以
承乏茲土不朽盛事分宜帥先於是開
局

蠻序之東軒博訪冥蒐闕疑徵信尤念
唯其事必唯其人爲之造廬敦趣又爲
之寓書束帛又爲之慎餼廩通臺庖時
則有若廣文先生余公鼎藩薦紳先生

嚴公而舒羅公安國余公象斗廖公萬
楚余公雲祚聞淹南部才軼西京錄移
文于北山表孝婦于東海凡三閱月部
署差定而今邑侯

張堂公學孔奉

簡命式宰是邦因得脫草受成請其釐正
中間傳論更藉新裁至如梓人副氏之

順德縣志

黃序

三

需則堂公捐俸三百金有奇獨力竣事
夫列國之志一代之史係之昔司馬氏
天官太史世其家由談及遷乃成史記
若通典並出衆力而特表杜佑陳書創
於史氏姚察考成於同時虞世基而歸
美於察子散騎常侍思廉至南齊江淹
已作十志沈約曾爲齊紀而書撰於梁

蕭子顯不朽之業各以其時斯舉也維
薦紳先生諸公克和厥中維邑侯堂公
克成厥終培彝不敏經始基之庶幾稟
家嚴徵君之教讀先王大父廷尉侍御
公之書猥逢其盛附垂不朽焉若曰莫
爲之前雖美不彰莫爲之後雖盛而不
傳政恐簞揚之施重慚珠玉也其他封

順德縣志

黃序

日

域之表賦式之宜宦蹟之昭垂文獻之
林立已詳志傳並諸公序中茲不具論
順德縣縣丞前署本縣事關中黃培彝
謹撰



順德縣志序

縣之有志與國之有史名異而實同其
於編年紀事義例一也我順自景泰三
年建立地割南海三都山川風土田賦
人物宮室郊壇食貨藝文前學士謫令
順德錢公溥亦已紀載矣弘治三年蒼
梧吳公廷舉曾請其祖同鄉嘉魚李君

順德縣志

嚴序

一

承箕再志順德雖云搜奇抉異未久殘
缺無存至萬曆九年姑蘇葉公初春禮
聘惠陽葉君春及與邑人寺正梁君枉
臣復行修補可稱大備無何世道遷流
沿革任運後來之豪傑挺生豎立之勳
名遞起紀載未及癸卯甲辰之間膠西
張公其策來宰吾邑喜爲增入所詳者

科甲明經若傳記多徇情叙述名實不副今癸丑孟春署縣黃公培彝奉

上文行修造予不佞謬叨委任與羅君安國余君象斗廖君萬楚余君雲祚暨文學蘇君洪會同開局核實舉行自揣老耄寡文曷克勝任懽辭再三公曰志者記也無籍可稽惟年高有德涉歷已深

順德縣志

嚴序

二

見聞日廣週知世務方能微顯闡幽如錢糧戶口之增加兵農禮樂之權變大而名宦鄉賢小而仙釋流寓文章可飭吏治節孝可勵忠貞歲月有罕見之災祥險隘有隨時之防守非老成練達遐稽博覽何以分別賢奸作後來勸懲嗟嗟此舉關係匪輕搜往事於數十年之

前垂典型于千百載之後其嘉惠吾邑寔非淺鮮予因編輯成帙上之

新令三韓張君侯侯博綜今古宅念虛公備極叅稽復加論斷義捐俸金三百兩授梓以光盛事予更樂得纂修克襄厥美合前後計得十四卷謂之一邑信史可矣乃予則更有說焉縣治四面濱

順德縣志

嚴序

三

江地與南番枕連齒牙相錯村煙相望可保無虞惟是西南四十里外江透高讚兩鄉環水而居以舟代步東望橫流汪洋巨浸盜賊出沒久成窟穴今雖次第勦除然起滅無常終非樂土既設重鎮於邑城宜分百兵于此地長年守禦令鼠輩有奸不逞此則通縣萬民之福

或亦當事者所樂爲也并議以聞


邑人嚴而舒撰



順德縣志

後序

四



順德縣志序

志何昉乎昉於古者列國之史漢龍門
司馬氏惟最著唐宋諸名家亦各自爲
史所以彰善癉惡勸懲當世管人蓋基
重之我順弘治年間始爲志逮萬曆
乙酉邑侯葉公初春聘惠陽葉君春及
與邑先達寺正梁君柱臣載筆纂修其

順德縣志

余序

一

間地里建置祠祀賦役官師人物選舉
流寓雜志比於錢太史之草創鄧子幾
之續編亦既瞭若指掌矣至康熙二年
膠西張公其策再涖吾順復行修輯止
詳選舉餘尚缺略今

上誕敷文教欲通知天下山川風俗人物

臧否十一年

特允閣臣之請通行直隸各省罷邑方州
悉以志上之史館爲大一統成書時署
篆黃公培彝廣文余君鼎藩請邑賢嚴
君而舒羅君安國廖君萬楚文學蘇君
洪及家姪雲祚修纂余亦辱聘旣而太
守汪公永瑞復徵雲祚入五羊校輯郡
志同事寥寥自顧謏才渺識難勝是任

順德縣志

余序

二

固辭再三黃余二公請益力且曰千金
之裘非一狐之腋茲事重大非公孰克
襄厥成余因唯唯勉應就局數月梭閱
舊志采訪輿論凡前賢之吏治嘉績德
業文章與夫忠孝節義山林隱逸所見
所聞悉登諸篇以補前志所未備而嚴
君年高識廣實總其成焉十二年夏初

三韓張君侯奉

命來宰鳳城以史遷之才秉董狐之筆留
心邑乘復集同事諸公暨不佞終始其
事若傳若論多出君侯獨斷潤色鴻文
其當今之公孫僑歟是冬陽月余適有
先慈之變伏苦藉塊筆硯皆枯而志已
告竣進之君侯君侯慨然捐俸授諸劄

順德縣志

余序

二

刷余美君侯之嘉意是役復喜志之有
成也遂爲序
昔

康熙十三年甲寅季春朔越壬午邑人
余象斗撰



順德縣志序

邑之有志猶國之有史昔春秋成而亂臣賊子
懼曷懼乎五霸迭興中間僭竊假冒人之善惡
事之得失皆紀於冊使亂臣賊子見之有以禁
其欲而不敢肆故懼之也懼心生而勸善懲惡
知所勵矣

司風教者其以是而闡前徽作後起故春秋以
史而進於經寧志而不等於史其是非敢易言

順德縣志

羅序

乎

今天下大一統文教淪洽

天子命輶軒之使自十五國以及遐陬海甸罔
不欲備悉其山川險易地形阨塞戶口盈縮與
夫忠孝節烈懷芳奮義之士備載以成一代之
書然

清朝鼎革之後官階誥命真贋難分忠孝節義
人思假借故掌文書者往々鄭重閣筆焉故事

順德縣志

羅序

二

貴明白簡實理貴正大無阿若以窈冥幽昧籠
罩一時遂使獎善懲惡之訓反開千古不決之
疑斯已過矣故圖經輿地賦役建置官師人物
秩祀吳西葉公之所臚列經制班々備矣若添
官設鎮則自康熙甲辰始也若乃忠孝節烈清
風高蹈之輩所過都鄙長老類能言其大槩乃
亦有優孟衣冠混人耳目者則闕之康熙三年
續志董其事者黎吏耳更無一賢士大夫與之

共事徵文考獻之典進退於胥吏之手予奪於
素不更事之人沿習而行任意出入毋論不能
原本山川搜抉遺軼然穢惡成風令人噴飯則
闕之蓋褒善誅惡據事直書而是非自見若士
師之斷獄理定而詞具詞具而獄成也昔夏原
吉湖州治水黑衣神與金甲神交訴原吉牒於
海神震死一蛟及還朝上聞問狀原吉對以朝
廷威德百神效靈時楊文貞欲錄其事付史館

成祖以事涉幽怪不允其錄誠慎之也故事涉不經則闕之顧是役也勉從前署黃學師余再三委屬載歷葛裘其間或考訂舊志或斟酌新編皆細加搜採廣稽輿論寧方無員寧真無偽寧謝不明無蹈不公寧徑々以來謗無唯々以府私以質之黃余兩公亦咸諒信以傳信非訛以傳訛者也雖不敢仰麟史於萬一而知我罪我蓋凜乎其慎之也今志事將竣會遼陽

順德縣志

羅序

三

張君侯新蒞茲邑甫下車即申六箴飭糧米去臨尖禁加耗蠲夫甲以救世之仁為濟時之畫海內喁々思脫苦海而登衽席夫我侯洞悉民艱釐奸剔蠹有如觀火則志書一事後有踵事增華情出陳請則我侯胸有全史筆邁董狐當予當奪又何容贊一詞乎若夫邑於百粵僅如黑子之着面亦與東新等耳而建閫置牙倍於他屬設總鎮設左右營設鎮標參遊設城守克

鞏海邦誠保障之密也而兵猶半駐民間祠宇二百餘所是有利而未必無害也舊志遶城河池廣三丈深半之自碧鑑至於南河而東而北達於石湖奔流交護今奸民包塞沙壅水澗舟楫不通是水不朝宗也浙西倪君侯神步建塔以衛捍門夾道松蔭蜿蜒十里矯々如龍以故人文蔚興宦業焜炳今兵丁奸棍旦々斧鑿伐其條又伐其肆相尋未已梁圯堤崩是文明厄

順德縣志

羅序

四

塞也故事有時勢之所得為亦有時勢之所不得為其所得為者法禁之令止之其所不得為者事勢齟齬君子遂忽然已乎語曰琴瑟不調必解而更張之則所以揆文奮武以作新於土地人民政事者必有按圖而補救之矣

邑人羅安國撰



順德縣志序

古者列國有史縣志則一邑之史也
今聖天子在上雅意人才留心史籍凡與
石渠天祿之選者悉皆博物洽聞之
人於以黼黻弘猷助揚雅化俾文教
覃敷於莫外至捷也復於萬幾之暇
披閱海內輿圖職方物志

大中丞劉公遂命各郡縣以次編緝遺

順德縣志

余序

者拾之闕者補之續成前志庶幾今
日之忠臣孝子理學真儒卽異時之模
楷師範也緬維古昔輶軒採風觀方
問俗其間山川城郭土田人民若者
當因之若者當創創之靡不詳載
備列瞭如指掌我順自明景泰三年
創建邑治太史錢公溥暨蒼梧吳公
廷舉紀載編纂靡有遺闕迨萬曆甲

申吳西葉公初春來宰順邑重修昔
志燦然明備迄癸卯甲辰膠西張公
其策復修然不過取一二稗野增入
簡畧實甚焉今幸

培彝黃父母攝篆吾邑戴星勤瘁政通
人和晨昏之前惟勤勤懃懃以纂輯
邑志爲務與

鼎藩廣文余先生朝夕商確一出一入

順德縣志

余序

罔不備極詳明猶慮海有遺珠復親
至

啟聖祠開纂延請嚴君而舒羅君安國
廖君萬楚蘇君洪與余大阮象斗暨
不佞共襄厥事繼而遼左

張公學孔拜

命來臨至邑之日剔蠹釐奸民歌召杜念
邑乘所紀戶口賦役於志乎考之古

蹟人物於志乎晰之厥繫匪輕迺捐

俸橐金鏤之梨棗以垂久遠余自維

天性拙直任茲鉅典惟隕越是虞然

從諸君子後以效一得雖不敢謂今

茲之董狐然庶以成孫盛吳競實錄

之志耳因念順劇邑也僻處偏疆於

山見錦巖鎗岡之奇於水見石湖鑑

溪之浩以及青雲峻塔五峰聳峙金

順德縣志

余序

三

山鉢嶺秀甲諸峰類多瑰奇傑出者

生於其間以鍾山川之秀行將自邑

而羈自羈而省彙成通志上之

當宁為史册光則勿謂一邑之志非即萬

世之信史也謹序

賜同進士出身邑人余雲祚撰



順德縣志序

三韓張使君使君姓氏見前序涖吾順之明年政通

人和百度維修間從公餘釐輯邑志既成屬

敘於何子廷相先是羈志伊始汪太守名永瑞江

南人丁亥進士由知縣轉部屬出為河南學憲改同知陞廣州守愿以幣徵

廷相遠道

京師試天官尚書省未克共命屬有令請則

再拜謝不敏夫羈邑之有志列國之有史也

順德縣志

何序

一

由邑而推之若州羈若行省以迄天下其載

記博博則從略由天下而推之若行省若羈

以視方州大邑其取裁一一則從詳考古鏡

今當世得失之林也乃吾邑之有志也抑眎

他邑較殊有明景泰邑以景泰三年建實肇造艷景

泰以前志未嘗志也山川采阻代有聞人僅

附羈國史乘中究之傳者什一闕如者什九

等而上之其軼乃時時見於周職方翰雅南

越志漢書駱越東甌吳楚紀聞南部新書垂
二百有餘載星連牛女地應維揚南衡清淑
之氣蜿蜒扶輿磅礴而鬱積其君子慎廉隅
其小人重犯法相與勉為忠厚而耻為浮薄
翕然稱極盛焉至於聲教帥先實視長令循
良有傳軼美西京四方之游宦茲土者苟利
於民聲譎藉藉率得報最躋臺省禁近以行
五嶺而南洵為易治諸如方言物產姑俟洽

順德縣志

何序

二

聞唯此二百有餘載或三登而泰或艸昧而
屯士生其間為名公鉅卿經國大業不朽盛
事何以寔至而名實之何以有高世之行或
負遺俗之累立乎今日仰止先民既如海上
三山邈焉其不可即即至勝國而後鼎革以
前匹夫慕義何處不勉其已見諸志者竹帛
之究其未見諸志者世其家譜藏之名山亦
等之春秋微顯志晦之例文見於此起義在

彼云爾今

天子建中和之極訪道右文

使君尹茲邦游刃恢乎用能昭

聖朝子惠元元至意遙瞻濱海丕集澤鴻一二

赤子弄兵於潢池者亦已持鉤鉏為民稅刀

劍奉吏庶幾扶杖觀太平矣然而科第之盛

匪休卉人而閎闊之光尚縣異日所稱人文

淵藪冠絕一時如孫內翰名黃號西菴官翰林院典籍見志

順德縣志

何序

三

之才藻擅風雲梁元公名儲會元首輔謚文康並見郡邑志之

忠貞懸日月不少驟見將風會偶然抑漢史

謂禮樂百年後興大易亦云觀乎人文以化

成天下其在斯乎其在斯乎廷相不敏雅重

使君之賢嘉

使君之志有成兼為吾邦持左券也遂書以

歸之

皆

康熙十二年歲在癸丑嘉平月上澣之穀邑

人何廷相頓首拜撰



順德縣志

何序

四

賢侯張使君重修順德縣志題記

諱學孔號魯人三韓名家子癸卯雋京闈起家邑令蒞治逾年報政上考

邑志甫成余既拜手颺言藉報

賢侯張使君附垂不朽矣比廣文先生

邑廣文余名鼎藩號鏡卷古梅人舉明經三任司鐸有聲復過余

請曰邑而志也徵文獻也鏡治忽也

大尊

王也省成於

順德縣志

何記

一

使君而觀成於父老子弟都人士薦紳

先生今所費不貲劑氏之掌工師之

所取材眎溼世露臺差倍殺青楮墨

之值又稱之先生豈有意乎余應之

曰唯唯否否

使君廉吏也志而成庸詎以廉故重勞

使君九牧之金乃範禹鼎千狐之腋合

紉秦裘徵廣文先生言余亦重懼夫

使君之猷為君子也雖然

使君廉吏也廉則潔已潔已則能奉公

以余所聞

使君尊人

太翁太先生

余曩在京師得知太翁有重名稱長者行至

高一時偉人鉅公所稱賢豪間者群

願交驩紫陌之塵連騎方軌輒奉干

金為

順德縣志

何記

二

太翁壽

使君從官舍走一介使起居

太翁

太翁必遙祝再三謂大官祿養何如教

孝親民其勉之官毋負

聖天子惠中國綏四方至意又時時給車

騎投贈之餘佐官舍所不逮

使君奉教唯謹益得覃意於治豈弟之

聲隆隆而起允若茲任舉盤錯無足

為

使君難茲志也吾固知其咄嗟辦也翼

日

使君上朔謁

澤宮屬余以公至見有若考互者庀材者

捆載者林立者磨厲以須者有挾中

書令毛君側里褚先生與俱者鱗鱗

順德縣志

何記

三

錯錯羣拜命於堂下廣文先生顧余

而笑行語之曰是固

使君悉歲祿之入預佑其值以趨志事

者也

邑志授梓曰梨棗曰副勝曰籍書計值二百餘金楮墨強半先

是薦紳里先擬為樂諭詢謀僉同

是日使君偕余詣學講六箴志

局在學宮之內為記所見如此

使君也賢唯若也賢